

Africa deindè subit nigro contincta colore ;
Vasta quidem tellus , sed non ita culta , videtur
Quæ regione sui media deserta propè esse .
Namque ibi arenosi montes , campique feruntur
Instabiles , & læcla tenent invisa ferarum .
Nilus eam pluvia , & cœlesti humore carentem
Abluit exundans , & largo flumine ditat .
Hic est fertilis Ægyptus , Nomadesque vagantes ,
Et Mauri , & Numidæ , sunt hic Garamantes , & ora
Exusti Æthiopes , Nubiæque calentia regna :
Multaque præterea populorum nomina , multæ
Regnantum latè ditiones . Ultima restat
Europa , a Tyria tenuit quæ Virgine nomen .
Hanc Jove cornigero , dum littore luderet inter
Æquales ætate simul florente puellas ,
Deceptam memorant Vates , vectamque per æquor
In Cretam : trepidans ex æquore respiciebat ,
Æquore dum Tauri tergo vcheretur amantis ,
Littus respiciebat , eoque in littore pubem
Tendentemque manus , iterumque , iterumque vocantem ,
Pulchraque plus lacrymis quam fluctibus ora rigabat
A magno nuptam se ferri ignara Tonante .
Virginis hujus habet nomen , quæ dicitur Orbis
Tertia pars veteris , longè minima inter utramque
Et Libyæ , atque Asiæ partem ; sed enim magis illis
Nobilitata , superque alias florentior omnes .

Atque ea Parrhasiæ qua latè subjacet Ursæ ,
Moscorum imperium complectitur , hisque propinquos
Suecosque , Danosque , & quorum nomina versu
Claudere Musæ vetat , Boreæque , & frigoris ejus
Indigenas ; nec non illa tellure Britannos
Avulsos paulùm , & munitos æquore circum .
Pars alia Europæ , qua se convertit ad Austrum ,
Cum regnis te vasta tuis Hispania , pulchramque
Italix pariter tellurem , Pannoniamque ,
Et Misum , & Thracum , & Grajorum continet arva .

At